

丁甘仁醫案精華

上海秦伯未編纂

□ 中 風

年甫半百。陽氣早虧。賊風入中經。膈榮衛痺塞不行。陡然跌仆。成中。舌強不語。神識似明似昧。嗜臥不醒。右手足不用。風性上升。痰濕隨之。阻於廉泉。堵塞神明也。脈象尺部沉細。寸關弦緊而滑。苔白膩。陰霾瀰漫。陽不用事。幸小洩未遺。腎氣尙固。未至驟見脫象。亦云幸矣。急擬先聖小續命湯加減。助陽祛風。開其痹塞。運中滌痰。而通絡道。冀望應手。始有轉機。

淨麻黃 熟附片 川桂枝 生甘草 全當歸 川芎 姜半夏 光杏仁 生姜汁 淡竹瀝

再造丸

又 兩進小續命湯。神識稍清。嗜寐漸減。佳兆也。而舌強不能言語。右手足不用。脈息尺部沉細。寸關弦緊稍和。苔薄膩。陽氣本虛。藩籬不固。賊風中經。經膈

痹塞。痰濕稽留。宗氣不得分布。故右手足不用也。腎脈絡舌本。脾脈絡舌傍。痰阻心脾之絡。故舌強不能言。靈機堵塞也。雖見小效。尙不敢有恃無恐。再擬維陽氣以祛邪風。滌痰濁而通絡道。努力前進。以觀後效。

熟附片 雲茯苓 川桂枝 姜半夏 生甘草 枳實灰 全雷歸 光杏仁 大川芎

炙殭蠶 生姜汁 淡竹瀝

又服三劑。神識較清。嗜寐大減。略能言語。陽氣有流行之機。濁痰有克化之漸。是應手也。惟右手足依然不用。腑氣六七日不行。苔膩。脉弦緊。漸和。尺部沉細。腎陽早虧。宗氣不得分布。腑中之濁垢。須陽氣通。然後能下達。經腑之邪風。必正氣旺。始托之外出。仍擬助陽益氣。以驅邪風。通胃滌痰。而下濁垢。腑氣以下行爲順。通腑亦不可緩也。

生黃耆 桂枝 附子 生甘草 當歸 川芎 雲茯苓 風化硝 全瓜蒌 枳實炭

淡菴蓉 半硫丸

又。腑氣已通。濁垢得以下行。神識已清。舌強。言語未能自如。右手足依然不用。脈弦緊轉和。尺部沉細。陽氣衰弱之體。風爲百病之長。陽虛之邪風。卽寒中之動氣。陽氣旺一分。邪風去一分。濕痰盤踞。亦藉陽氣充足。始能克化。經所謂陽氣者。若天與日。失其所則折壽而不彰。理有信然。仍助陽氣以祛邪風。化濕痰而通絡道。循序漸進。自獲效果。

生黃耆

生白朮

生甘草

熟附子

桂枝

全當歸

川芎

姜半夏

西秦朮

淮牛膝

嫩桑枝

指迷茯苓丸

年逾古稀。氣陰早衰於未病之先。舊有頭痛目疾。今日陡然跌仆成中。舌強不語。人事不省。左手足不用。舌質灰紅。脈象尺部沉弱。寸關弦滑而數。按之而勁。良由水虧不能涵木。內風上旋。挾素蘊之痰熱。蒙蔽清竅。堵塞神明出入之路。致不省人事。痰熱阻於廉泉。爲舌強不語。風邪橫竄經絡。則左手足不用。金匱云。風中於經。舉重不勝。風中於腑。卽不識人。此中經兼中腑之重症也。急

擬育陰熄風。開竅滌痰。冀望轉機爲幸。

大麥冬 元參 羚羊片 仙半夏 川貝 天竺黃 明天麻 陳胆星 竹茹 枳實

全瓜蒌 嫩鈎鈎 淡竹瀝 生姜汁 至寶丹

又 兩投育陰熄風。開竅滌痰之劑。人事漸知。舌強不能言語。左手足不用。脈尺部細弱。寸關弦滑而數。舌灰紅。高年榮陰虧耗。風自內起。風擾于胃。胃爲水穀之海。津液變爲痰涎。上阻清竅。橫竄經膈。諸恙所由來也。本症陰虛。風燭堪慮。今仿河間地黃飲子加味。滋陰血以熄內風。化痰熱而清神明。風靜浪平。始可轉危爲安。

大生地 大麥冬 川石斛 羚羊片 仙半夏 明天麻 左牡蠣 川貝母 陳胆星

炙遠志 九節菖蒲 全瓜蒌 嫩鈎鈎 淡竹瀝

中風延今一載。左手不能抬舉。左足不能步履。舌根似強。言語蹇澀。脈象尺部沉細。寸關濡滑。舌邊光苔薄膩。年逾七旬。氣血兩虧。邪風入中經膈。榮衛

痺塞不行。痰阻舌根。故言語澀蹇也。書云。氣主煦之。血主濡之。今宜益氣養血。助陽化痰。兼通絡道。冀望陽生陰長。氣旺血行。則邪風可去。而濕痰自化矣。

潞黨參 生黃芪 生於朮 生甘草 熟附片 川桂枝 全當歸 大白芍 大川芎

懷牛膝 厚杜仲 嫩桑枝 紅棗 指迷茯苓丸

舊有頭痛眩暈之恙。今忽舌強不能言語。神識似明似昧。手足弛縱。小溲不固。脈象尺部細小。左寸關弦小而數。右寸關虛滑。舌光紅。此陰血大虧。內風上擾。痰熱阻絡。靈竅堵塞。中風重症。急擬滋液熄風。清神滌痰。甘涼濡潤。以冀挽救。

大麥冬 大生地 川石斛 左牡蠣 生石決 煨天麻 川貝 炙遠志 天竺黃

竹瀝半夏 鮮竹茹 嫩鈎鈎 淡竹瀝 珍珠粉

右手足素患麻木。昨日陡然舌強不能言語。診脈左細弱。右弦滑。苔前光後膩。此乃氣陰本虧。虛風內動。風者善行而數變。故其發病也速。挾痰濁上阻。

廉泉橫竄絡道。營衛痺塞不通。類中根苗顯著。經云邪之所湊。其氣必虛。又云。虛處受邪。其病則實。擬益氣熄風。化痰通絡。

吉林參鬚 雲茯苓 炙薑蠶 陳廣皮 生白朮 白附子 炙遠志肉 黑稽豆衣 竹瀝半

夏 陳胆星 九節菖蒲 姜竹茹 嫩鈎鈎

又 舌強蹇于語言。肢麻艱于舉動。口乾不多飲。舌光絳中後乾膩。脈象右細弱。左弦滑。如昨診狀。心開竅於舌。腎脈絡舌本。脾脈絡舌旁。心腎陰虧。虛風內動。挾痰濁上阻廉泉。先哲云。舌廢不能言。足痿不良行。卽是瘖痺重症。再仿地黃飲子意出入。

大生地 雲茯苓 陳胆星 九節菖蒲 川石斛 竹瀝半夏 川象貝 炙遠志 南沙參

煨天麻 炙姜蠶 嫩鈎鈎

類中偏左。半體不用神識。雖清。舌強言蹇。咬牙嚼齒。牙縫滲血。呃逆頻仍。舌絳。脈弦小而數。諸風掉眩。皆屬於肝。陰分大傷。肝陽化風上擾。肝風鼓火內

煽痰熱阻於廉泉之竅。肺胃肅降之令不行。恙勢正在險關。勉擬地黃飲子合竹瀝飲化裁。挽墮拯危。在此一舉。

鮮生地 川石斛 瓜蒌皮 柿蒂 大麥冬 抱茯神 生蛤壳 老枇杷葉 西洋參

川貝母 鮮竹茹 嫩鈎鈎 淡竹瀝 真珍珠粉 真猴棗粉

傷寒

寒邪外束。痰飲內搏。支塞肺絡。清肅之令不行。氣機窒塞不宣。寒熱無汗。咳嗽氣喘。難於平臥。胃有蘊熱。熱鬱而煩燥。脈浮緊而滑數。苔薄膩而黃。宜疎外邪以宣肺氣。化痰飲而清胃熱。大青龍加減。

蜜炙麻黃 雲苓 橘紅 炙款冬 川桂枝 象貝母 半夏 旋覆花 石膏 杏仁
生甘草

發熱不退。胸悶嘔吐。舌中有一條白苔。脈弦滑而數。太陽陽明未解。痰滯逗留。中焦氣滯。宣化失司。當擬梔豉湯。疏解表邪。溫胆湯。蠲除痰飲。俾得邪從

外解。飲從內化。則熱可退。而嘔吐自止。

淡豆豉 黃芩 半夏 炒穀麥芽 赤芍 生姜 川桂枝 竹茹 陳皮 鷄金炭 澤瀉

太陽病早下。邪不得達。復因飲食不謹。痰食盤踞清陽之位。脾胃升降失常。胸脘脹痛拒按。嘔吐不能食。舌膩脈滑。脘爲陽明之所。痰食阻於中焦。則脹痛。胃氣不得下降。則嘔吐。此結胸之症也。化痰滯。則脹痛自消。和胃氣。則嘔吐自止。擬小陷胸湯加減。

姜川連 陳皮 大砂仁 生姜 姜半夏 枳實 六神麴 姜竹茹 瓜蒌皮 製川朴

萊菔

始由發熱惡寒起見。繼則表不熱而裏熱。口乾不欲飲。四肢逆冷。脈沉苔膩。加之嘔噦呃逆。大便不實。外邪由太陽而陷於太陰。不得洩越。陽氣被遏。胃陽不宣也。脈沉非表。爲邪陷於裏之證。四逆肢冷。經所謂陽氣衰於下。則爲寒厥是也。傷寒內陷之重症。姑擬四逆湯加減。通達陽氣。和胃降濁。

淡乾薑 丁香 川桂枝 六神曲 炙甘草 柿蒂 熟附子 川朴 陳皮 仙半夏

熟穀芽 生薑

傷寒挾滯。太陽陽明爲病。身熱十餘日不解。脊背微寒。脈浮滑而數。口乾不多飲。唇焦苔薄膩而黃。五六日不更衣。太陽之邪未罷。陽明之熱薰蒸。腸中濁垢。不得下達也。擬桂枝白虎湯加減。疎太陽之邪。清陽明之熱。助以通腑。陽明有胃實當下之條。

川桂枝 生甘草 元明粉 竹茹 石膏 瓜蒌 川軍 半夏 姜 棗

傷寒兩感。挾滯交阻。太陽少陰同病。惡寒發熱。頭痛無汗。胸悶腹痛拒按。泛噁不能飲食。腰痠骨楚。苔白膩。脈象沉細而遲。病因經後房勞而得。下焦有蓄瘀也。慮其傳經增劇。擬麻黃附子細辛湯加味。溫經達邪。去瘀導滯。

淨麻黃 熟附片 細辛 赤苓 仙半夏 枳實炭 製川朴 大砂仁 查炭 延胡索

兩頭尖 生薑

診脈浮緊而弦。舌苔乾白而膩。身熱不揚。微有惡寒。咳嗽氣逆。十四晝夜不能平臥。咽痛淡紅不腫。兩頰赤色。據述病起於奪精之後。寒邪由皮毛而入於肺。乘虛直入少陰之經。逼其水中之火。飛越於上。書曰。戴陽重症也。閱前方始而疎解。前胡薄荷牛蒡杏仁之品。繼則滋養。沙參石斛毛燕川貝。不啻膈靴搔痒。揚湯止沸。夫用藥如用兵。匪勢凶猛。非勇悍之將。安能應敵也。拙擬小青龍合二加龍骨湯。一以溫解寒邪。一以收攝浮陽。未識能得挽回否。尙希明哲指教。

蜜炙麻黃 川桂枝 大白芍 生甘草 熟附片 牡蠣 花龍骨 五味子 乾姜 拌搗
光杏仁 仙半夏 水炙桑皮 遠志

傷寒兩感。太陽少陰爲病。太陽爲寒。水之經。本陰標陽。標陽鬱遏。陽不行。故發熱惡寒而無汗。少陰爲水火之臟。本熱標寒。寒入少陰。陰盛火衰。完穀不化。故腹痛而洞洩。胸悶嘔吐。舌苔白膩。食滯中宮。濁氣上逆。脈象沉遲而細。

仲聖云。脈沉細。反發熱。爲少陰病。與此吻合。挾陰挾食。顯然無疑。症勢非輕。姑宜溫經達邪。和中消滯。

淨麻黃 熟附子 蒼蘇梗 製川朴 枳實炭 仙半夏 赤苓 白蔻仁 六神曲 生姜
乾荷葉

又服溫經達邪。和中消滯之劑。得微汗。惡寒發熱較輕。而胸悶嘔吐。腹痛泄瀉。依然不止。苔膩不化。脈沉略起。太陽之經邪。雖有外解之勢。少陰之伏邪未達。中焦之食滯互阻。太陰清氣不升。陽明濁氣不降也。恙勢尙在重途。還慮增劇。仍守原法出入。擊鼓而進取之。

荊芥 防風 淡豆豉 熟附子 蒼蘇梗 仙半夏 生姜 枳實炭 製川朴 六神曲
大腹皮 酒炒黃芩 乾荷葉

傷寒兩候。壯熱無汗。譫語煩躁。舌焦無津。脈象沉數。肢反逆冷。五六日不更衣。此邪已化熱。由陽明而傳厥陰。陰液已傷。燥矢不下。有熱深厥深之見象。

風動痙厥。恐在目前。急擬生津清熱。下則存陰。以望轉機。

生石膏 生甘草 肥知母 鮮生地 元參 鮮石斛 郁李仁 大麻仁 天花粉 茅蘆根
青寧丸

傷寒一候。經水適來。邪熱陷入血室。瘀熱交結。其邪外無向表之機。內無下行之勢。發熱惡寒。早輕暮重。神糊譫語。如見鬼狀。脇痛胸悶。口苦苔黃。少腹痛拒按。腑氣不行。脈象弦數。症勢重險。恐再進一步。則入厥陰矣。姑擬小柴胡湯。加清熱通瘀之品。一以和解樞機之邪。一以引瘀熱而下行。冀其應手爲幸。

柴胡 炒黃芩 羚羊角 藏紅花 桃仁泥 青皮 絳通草 赤芍 清甯丸 生蒲黃

□ 溫 病

風溫秋燥之邪。蘊襲肺胃兩經。肺主一身之氣。胃爲十二經之長。肺病則氣機窒塞。清肅之令不行。胃病則輸納無權。通降之職失司。以故肌熱不退。業

經旬餘。咳嗽痰多。脅肋牽痛。口渴唇燥。穀食無味。十餘日未更衣。至夜半咳尤甚。不能安臥。象似迷睡。子丑乃肝胆旺候。木火乘勢升騰。擾犯肺金。肺炎葉舉。故咳嗽脅痛膺痛。若斯之甚也。脈象尺左細數。左寸關浮弦而滑。右尺軟數。右寸關滑數不揚。陰分素虧。邪火充斥。顯然可見。據述起病至今未曾得汗。一因邪鬱氣閉。一因陰液虧耗。無蒸汗之資料。脈症參合。症非輕淺。若僅用汗法。則陰液素傷。若不用汗法。則邪無出路。顧此失彼。棘手之至。輾轉思維。用藥如用兵。無糧之師。利在速戰。急宜生津達邪。清肺化痰。去邪所以養正。除暴所以安良。然乎否乎。質之。高明。

天花粉 光杏仁 金銀花 冬桑葉 生甘草 川象貝 連翹壳 淡豆豉 嫩前胡

薄荷葉 冬瓜子 黑山梔 廣鬱金 活蘆根 枇杷葉露

又 風燥外受。溫從內發。蘊蒸肺胃兩經。以致肌熱旬餘不退。咳嗽痰多。脅肋牽痛。不便轉側。口渴溲赤。夜半咳甚。氣逆。直至天明稍安。夜半乃肝胆旺時。木

火乘勢升騰。擾犯於肺。加之燥痰戀肺。肺炎葉舉。清肅之令不能下行。穀食衰少。十天不更衣。胃內空虛。腸中乾燥可知。唇焦舌不紅絳。但乾而微膩。脈象兩尺濡數。兩寸關滑數無力。經云尺膚熱甚爲病溫。脈數者曰溫。皆是伏溫薰蒸之見象。平素陰液虧耗。溫病最易化熱傷陰。是陰液愈傷。而風溫燥痰爲患愈烈也。欲清其熱。必解其溫。欲化其痰。必清其火。昨進生津解溫。清肺化痰之劑。脅痛潮熱。雖則略平。餘恙依然。尙不足恃。頗慮喘逆變遷。今仍原意去表加清。清其溫。卽所以保其陰。清其燥。卽所以救其肺之意。未識能出險入夷否。鄙見若斯。擬方于後。

天花粉 甘菊花 冬桑葉 川象貝 山梔 生甘草 銀花 連翹 光杏仁 竹茹

絲瓜絡 蘆根 竹油 枇杷葉露

又 兩進清解伏溫。清化燥痰之劑。昨日申刻得汗不暢。伏溫有外達之勢。肌熱較輕而未盡退。咳嗽脅痛氣逆。亦覺輕減二三。固屬佳兆。無如陰液虧耗之

體木火易熾。津少上承。肺失輸化之權。燥痰膠結難解。口乾欲飲。唇燥洩赤。脈象寸關滑數不靜。尺部無力。舌苔化而復薄膩。王孟英先生云。第二層之伏邪。有類乎斯。真陰如此之虧。溫邪若斯之重。安有不肌肉消瘦。皮毛憔悴者乎。所慮正不勝邪。虛則善變。尙未敢輕許無妨也。昨方既獲效機。仍守原意出入。

天花粉 薄荷葉 光杏仁 鮮竹茹 蘆根 生甘草 金銀花 川象貝 通草 淡竹油

冬桑葉 連翹殼 冬瓜子 黑山梔 枇杷葉

又 連進清解伏溫。清燥化痰之劑。午後申刻得汗兩次。伏溫有外解之象。仲景云。陽明病欲解時。從申至戌上是也。溫熱已去其七。咳嗽氣逆亦去其半。惟形神衰弱。唇燥口乾。睡則驚悸。小溲未清。右脈滑數較和。左脈弦數不靜。舌苔化而未淨。此氣液素虧。肝熱內熾。肺胃兩經受其摧殘。安能輸化津液。灌漑于五臟。灑陳於六腑哉。脈證參合。險關已逾。循序漸進。勢能入於坦途。仍議清餘炤以化痰熱。生津液而滋化源。雖不更衣。多日不食。胃中空虛。腸中乾燥。雖有

燥屎勿亟亟於下也。卽請明正。

天花粉 光杏仁 鮮竹茹 黑山梔 淡竹油 生甘草 川象貝 金銀花 知母 活蘆根

冬桑葉 硃茯神 連翹壳 通草 枇杷葉

又 身熱已去七八。咳嗽亦減五六。咳時喉有燥痒。鼻孔烘熱。口乾唇燥。舌苔化而未淨。肺金之風燥。尙未清徹。餘熱留戀。燥字從火。火灼津液爲痰。書所謂火爲痰之本。痰爲火之標也。右脈滑數較和。左脈弦數不靜。陰液虧耗。肝火易熾。胃氣未醒。納穀減少。脈證參合。漸有轉機之象。能得不生枝節。可望漸入坦途。前方見效機。仍守輕可去實。去疾務盡之義。若早進滋陰。恐有留邪之弊。拙見如此。卽請明正。

淨蟬衣 光杏仁 金銀花 花粉 炙兜鈴 輕馬勃 川象貝 連翹 生草 枇杷葉

冬桑葉 瓜蒌皮 黑山梔 竹茹 蘆根

又 病有標本之分。治有先後之別。病生於本者。治其本。病生於標者。治其標。

今治標以來。伏邪已解。肺炎亦消。咳嗽痰鳴亦減六七。惟陰分本虧。津少上承。餘焰留戀氣分。肺金輪布無權。厥陽易於升騰。口乾唇燥。頭眩且痛。形神衰弱。小溲帶黃。舌苔化而未淨。皆係餘燥爲患。燥字從火。火灼津液爲痰。有一分之二。燥則一分之痰。不能清徹也。左脈弦數已緩。右脈滑數亦和。恙已轉機。循序漸進。自能恢復原狀。再清餘燥。以化痰熱。生津液以滋化源。俾得津液來復。則燥去陰生矣。

淨蟬衣 生甘草 生石決 桑葉 活蘆根 輕馬勃 光杏仁 鮮竹茹 冬瓜子 枇杷葉
天花粉 川象貝 炙兜鈴 鉤藤

風自外來。溫從內發。風性屬陽。溫易化熱。熱盛生痰。風善上升。風溫痰熱。互蘊肺胃。發熱旬餘。口乾欲飲。咳嗽氣粗。脅肋牽痛。熱痰蒙蔽清竅。靈機堵塞。心主神明之所。變爲雲霧之鄉。神識縹糊。譫語妄言。起坐如狂。前醫疊投犀羚。不應。其邪在氣不在營也。况按胸腹之間。似覺悶脹。內夾宿食。又可知也。舌尖